

·gojgaeq·

Dahlungz Soengq Haiz

□ Lingz Siuyangh / 凌秀香

Denzyangz Yen baihnamz miz aen mbanj ndeu heuhguh Mbanj-gujmeij. Gizde raemx saw bya heu, haeux cuk bya biz, miz mboq miz gamj dohlai, lumjbaenz Mboqbugiuj, Mboqnazlungz caeuq Gamjganvwnz, Gamjganyinz daengjdaengi, gingjsaek gyaundeide maez vunz.

Ciet sam yied sam dwg hawfwen Mbanjugjmeij. Moix bi baez daengz ngoenzneix, gyoengq vunzmbanj daij seiq fueng bet baih comz daeuj gwnz haw guh fwen. Bohranz caeuq mehranz doiq fwen guh'angq, daegmbauq caeuq lwgsau guh fwen cam yah cam gvan, hauilai vunz couhwdw youq gwnz hawfwen guh fwen baenz gvanbaz. Ngoenzneix gwnz haw vunz rim haw rim gai, dauqcawq dwg sing fwen, sing fwen goksadsad, lwenq daengz byonghmbwn bae, nauhyied dangqmaz.

Riuz naeuz lungzvungz Mboq-nazlungz miz dahlwg ndeu, coh de heuhguh Dahlungz. Dahlungz din-fwngez lingzleih, ndang sang reux, naj maeq hau, gyaundeide dangqmaz. Bihaenx ciet sam nyied sam, de daeuj hawfwen Mbanjugjmeij guhcaemz, yinx ndaej hauilai daegmbauq ngonz de, yaek caeuq de guh fwen.

Gamjganvwnz miz daegmbauq ndeu, heuhguh Daeggan. Daeggan baez raen Dahlungz couh maez de lo, yawj ndaej myaiz yag caez. Yawj mbouj youqgaenj, Daeggan youq dangqnaaj vunzlai bae daeuq Dahlungz caemhcai q doengh din doengh fwngez dem. Dahlungz itseiz mbouj rox baenzlawz guh, lau dwk daej bae.

Mboqbugiuj miz daegmbauq ndeu, heuhguh Daeglunz. De rox ngoenzneix Mbanjugjmeij miz haw-fwen, baenzneix hix daeuj youz. Cingqngamj ndaej raen Daeggan daeuq Dahlungz, de couh gvaqbae lanz, mbouj hawj Daeggan gyawj Dahlungz. Gyoengqvunz youq henz hix baekvix Daeggan ndaq de guh mbouj deng, Daeggan raen najmong cij ndaej buetdeuz lo.

Daeglunz caeuq Dahlungz couh yienghneix roxnaj lo. Dahlungz raen Daeglunz mbauqndeide, ndang cangq, youh gamj bang vunz, miz di gyaez de lo. Baihneix Daeglunz raen Dahlungz gyaundeide caemhcai q hozunq, baez raen hix gyaez de lo.

Songde youq gwnz haw guh fwen, gangjgoj, mbouj rox mbouj nyinh mbwn laep lo, yienznaeuz sij mbouj ndaej doxbiek, hoeng aeu maranz ne. Doxbiek seiz, Daeglunz soengq aen mbajnyawh ndeu hawj Dahlungz, Dahlungz siujsim sisi dawz mbaj-

nyawh yo hwnjdaej.

Maranz le, Dahlungz ngoenzhwnz siengjniemh Daeglunz, de ciengzseiz dawz mbajnyawh Daeglunz soengq haenx okdaeuj yawj. Baez raen aen mbajnyawh, de couh lumj ndaej raen naj Daeglunz nei, ndawsim couh diemzsubsub. De ndaejhoengq couh guh gauh haiz ndeu yaek soengq hawj Daeglunz, dawz gij gyaez caeuq gij siengjniemh swheij yo youq ndaw haiz.

Ngoenzhaenx dwg haw Mbanjugjmeij, Dahlungz fwngez gaem gauh haiz bonjfaenh guh haenx daeuj daengz bakroen Mboqnazlungz deq, raen canghdawzrap ndeu gvaqdaeuj, Dahlungz cam de naeuz: "Daeggo, mwngz bae haw Mbanjugjmeij, gvaq Mboqbugiuj seiz, bang gou dawz gauh haiz neix hawj Daeglunz Mboqbugiuj, ndaej lw?" Canghdawzrap naeuz: "Ndae, ndae!"

Canghdawzrap laebdaeb ganj roen, gvaq Gamjganvwnz seiz, Daeggan cingq youq bakgamj lienh ndang, Daeggan raen ndaw rap canghdawzrap miz yiengh doxgaiq lwenqnyapnyap, couh haeujsim bae yawj. Baez yawj raen dwg gauh haiz gyaundeide ndeu, de ndawsim gag ngeix: Cij miz Dahlungz Mboqnazlungz cij guh baenz gauh haiz lengj baenzneix. Ndigah, de cung gvaqdaeuj yaek ciengj aeu gauh haiz neix.

Canghdawzrap raen de cung gvaqdaeuj rox de yaek guh yak, doq gaem faexhanz caeuq de doxbuek. Hoeng, doeklaeng dauqdaej lij miz ga haiz ndeu deng Daeggan ciengjdued bae lo, cij lw ga haiz ndeu youq ndaw rap. Canghdawzrap cij dawz ga haiz lw haenx soengq hawj Daeglunz, de lau deng naeuz, ndigah mbouj gamj caeuq byawz gangj miz ga haiz ndeu gaenq deng Daeggan ciengj bae lo.

Baez yaep da youh daengz ciet sam nyied sam hawfwen Mbanjugjmeij lo. Ngoenzneix Dahlungz caeuq Daeglunz youq gwnz haw doxraen lo. Songde doq ndaej raen couh bak mbouj daengx doxlwnh gij siengjniemh bonjfaenh.

Daeglunz dawz ga haiz haenx okdaeuj doiq Dahlungz naeuz: "Dahlungz ha! Yawj, mwngz soengq gou ga haiz neix, gou ngoenzhwnz coq youq henz swiz, raen de couh lumj ndaej raen mwngz....." Gangj daengz neix, Daeglunz nyaenx mbouj ndaej raemxda rih okdaeuj lo.

Dahlungz raen le gamjdoengh dangqmaz, hoeng de doeksaet cam: "Gou guh gauh haiz ndeu soengq hawj



mwngz, mbouj dwg ngamq soengq ga haiz ndeu bw!"

Cingq youq seizneix, Daeggan byaij gvaqdaeuj, ndaw fwngez de hix gaem ga haiz ndeu, daengz dangqnaaj Dahlungz naeuz: "Dahlungz ha, mwngz soengq gou ga haiz neix, gou hwnzhwnz got de ninz, gou got haiz ninz couh lumj ndaej got mwngz ninz nei."

Daeglunz dingq le ndatheiq sing hung naeuz: "Dahlungz ha, mwngz baenzlawz yienghneix sim lai? Gyaez bouxneix youh gyaez bouxhaenx!"

Dahlungz mbouj rox miz maz saeh, youh geizheih youh bakaj loeng-loeng mbouj rox gangj maz. Dingjilingz, seizneix canghdawzrap Dahlungz daengq de soengq haiz haenx cingq gvaq gizneix, de baez raen Daeggan couh fwngez vix coh de, ndaq naeuz: "Gou dauqdaej ndaej raen mwngz lo! Couhwdw mwngz, bi' gvaq gou bang Dahlungz soengq gauh haiz ndeu bae hawj Daeglunz, youq buenq loh deng ndaek vunzrwix neix ciengj bae ga haiz ndeu." Canghdawzrap doq gangj doq dawz faexhanz bae moeb Daeggan, Daeggan raen deng byoengqhangx-saez, couh riengjret buetdeuz lo.

Canghdawzrap cienqlaeng dauq yaek caeuq Dahlungz boizleix, gaenq raen Daeglunz caeuq Dahlungz doxgot ndaetndaet bae.....

Bihaenx liggaeuq caet nyied cocaet ngoenzde, Daeglunz caeuq Dahlungz baenzranz lo. Ngoenzhaenx haetromh, Daeglunz caenndang daiq bang vunz ndeu bae Mboqnazlungz cieq yahmoq.

Lih mbouj daengz Daeggan daiq bang bingmax ndeu youq byongh roen deq. Bang vunz Daeglunz deng bang bingmax Daeggan hoenx, gyoengqvunz sanqyaengyaeng. Daeggan baengh gij bingmax maenh'ak, gaeb ndaej Daeg-

lungz, dawz de at dauq Mboqbugiuj, oet de haeuj conghmboq bae, lij guh aen dourin ndeu daeuj saek aen conghmboq dem.

Daeglunz aenvih siengjniemh Dahlungz gvaqbouh, siengsim lai, ngoenzhaenx gyanghwnz couh dai bae lo, gij raemxda de bienqbaenz raemx-mboq, laeliklik mbouj daengx. Gvaqlaeng gyoengqvunz aeu raemxmbouq Mboqbugiuj caeuq megmba daengj doxgaiq daeuj doxgyaux, hoed baenz ciengq gwg. Vunz dangdieg dawz cungj ciengq neix heuhguh Gujmeij-ciengq. Cungj ciengq neix youh hom youh ndeigwn, gig mizmingz.

Caiq naeuz ngoenzhaenx, Dahlungz youq ranz deq Daeglunz daeuj cieq de, deq bae deq dauq cungj mbouj raen, sim de mbouj onj lo, nyinhnaeuz haengjdingh oksaeh lo. Ngoenz daihngaih, mwh Dahlungz rox Daeglunz gaenq youq haemhlwenz byonghwnz dai seiz, de daej dwk mbei yaek dek bae, doeklaeng ngunh bae lo, baez ngunh couh mbouj singj dauq, riengz Daeglunz caez bae lo.

Vunzranz dawz Dahlungz hoem youq laj bya Byaronghndwen. Ngamq hwnz ndeu, aen moh Dahlungz couh bienqbaenz ndaek rin sang ndeu, ngoenzhwnz caeuq Mboqbugiuj dox-muengh. Gvaqlaeng vunzlai heuh ndaek rin neix guh Rinmuenghgvn.

Gwnz dingj bya Byaronghndwen miz aen gumh ndeu, yiengh de lumj aen gungj ronghndwen nei, aen coh Byaronghndwen couhwdw yienghneix ndaej daeuj. Riuz naeuz moix bi cungj miz haemh ndeu, aen ronghndwen doek youq aen gumh dingj bya Byaronghndwen Mbanjugjmeij, gyoengqvunz naeuz Daeglunz caeuq Dahlungz couhwdw youq haemhhaenx doxraen.